

10 MAY 1996

Umno - Dataran

DATARAN MERDEKA SEKALI LAGI SAKSI PERPADUAN MELAYU

KUALA LUMPUR, 10 Mei (Bernama) -- Dataran Merdeka, duhulunya dikenali sebagai Padang Kelab Selangor, sekali lagi menjadi saksi perhimpunan raksasa parti Melayu UMNO yang satu ketika dulu menjadi tempat orang Melayu melaungkan semangat kemerdekaan di saat awal negara dibebaskan dari belenggu penjajah.

Seruan "Hidup Umno! Hidup Malaysia" kedengaran dilaungkan dengan penuh semangat oleh ribuan anggota Umno yang membanjiri dataran itu untuk menyambut ulangtahun ke-50 parti bersama pemimpin mereka.

Paluan 13 buah rebana ubi yang melambangkan 13 negeri dalam Malaysia bergema tatkala Presiden Umno Datuk Seri Dr Mahathir Mohamad tiba tepat jam 8.50 malam.

Ketibaan Perdana Menteri yang diiringi oleh pemimpin-pemimpin Umno yang lain disambut dengan hamparan permaidani merah menuju ke pentas utama yang dihias indah khusus untuk upacara gilang-gemilang itu.

Wakil-wakil parti utama dari 12 negara termasuk dari Indonesia, Singapura, Afrika Selatan, Bosnia, China, Thailand, Vietnam, Korea Utara, Filipina, Iraq, Kemboja, yang menjadi tetamu Umno, turut hadir untuk memberi penghormatan kepada acara bersejarah itu.

Upacara malam ini dimulakan dengan penyerahan bendera yang dibawa oleh empat wakil ahli Pergerakan Pemuda Umno yang datang dari empat penjuru negara bagi mewakili segenap lapisan pemuda Melayu negara.

Larian Pemuda Umno Empat Penjuru itu telah berlangsung sejak awal bulan ini dan melibatkan 16,000 anggota pergerakan pemuda Umno termasuk pemimpin-pemimpin peringkat negeri yang berganti-ganti membawanya sepanjang perjalanan ke ibu negara dari utara, selatan, timur dan Sabah.

Dr Mahathir menyampaikan amanat beliau lebih satu jam yang antara lain menekankan peri pentingnya orang Melayu bersatu-padu dan bekerjasama dengan kaum-kaum lain dan terus mengisi kemerdekaan.

Sajak nukilan beliau, "Perjuangan Yang Belum Selesai" sekali lagi dideklamasikan, tetapi kali ini oleh Ngasri Sain, bekas pengacara RTM, membuatkan ribuan penonton terharu.

Acara sambutan disudahi dengan pertunjukan video klip perjuangan Umno sejak zaman awal sehingga era kegemilangannya di bawah pimpinan Dr Mahathir serta nyanyian beramai-ramai lagu "Malaysia Tanahairku" dan "Negaraku". --
BERNAMA

ZAI OBA.